

Cart De'en Bzoj San Pabən' Par Beṇə' Colosas Ca'

*Pabən' chzoje' beṇə' ca' chso'elao' Jesocristən'
Colosasən'*

¹⁻² Nada' Pab naca' apostol che Jesocristən' con can' gwnalažə' Diozən'. Nada' chzoja' le'e nitə'əle Colosasən' le'e banacle lažə' na' Diozən' laogüe de'en ngodə'əle txen len Cristən', chedə' txen len neto' naccho family che'enə'. Beṇə' bišə'əcho Tem-tion' na' nada' chṇabto' lao Xacho Diozən' sotezə soe' gaquəlenšgacze' le'e na' gonšgue' ca so cuezle binlo len xbab de'en yo'o lo'o yichjla'ažda'olen'.

*Pabən' chone' orasyonṇə' par beṇə' ca'
chso'onlilažə' Cristən' Colosasən'*

³ Yoguə' las catə' chona' orasyon par le'e cho'a yelə' choxcwlen che Diozən' par le'e, Dioz ben' naquə Xa Xancho Jesocristən'.

⁴ Babenda' rson can' chonlilažə'əle Jesocristən' na' can' chaquele che yeziquə'əchlə beṇə' bagwlej Diozən' par zjənaquə' lažə' ne'enə'.

⁵ Cho'a yelə' choxcwlen che Diozən' de que lenle zocho lez žjəyecho len Diozən', can' gwyejni'ile catə'an gwzolaobzenagle che dižə' güen dižə' cobə che Jesocristən' de'en naquən de'e li.

⁶ Dižə' li che Jesocristən' de'en chzenagle chei bagosə'əlasən doxenlə na' beṇə' ca' choso'ozenag chei ga yoblə lecə chso'one' güen na' choso'ozejni'ine'en

benə' yoblə can' chon le'e dezd žan' catə'an bzena-
glen de'e nech na' gwņezele de que de'e li nži'ilažə'
Diozən' le'e.

⁷ Epafras da'onə' bzejni'ine' le'e xtižə' Cristən'
lgu'a nada'. Chone' xšin Cristən' can' chona' par
chaclene' le'e na' zotezə zoe' chone' complir can'
cheyalə' gone'.

⁸ Epafras na'anə' bagwne' nada' can' baben
Spirit che Diozən' par ničh chaquele che ljuežjle na'
chacteile chia'.

⁹ De'e na'anə' dezd catə'an gwņezda' can'
chonlen', yoguə' laste chona' orasyon lao Diozən'
par le'e chnaba' gon Spirit che'enə' le'e yoguə' claste
yelə' sin' na' yelə' chejni'i par ničh ca' ənezele tcho'a
tšao' can' chene'ene' gonle.

¹⁰ Chnaba' ənezele can' chene'ene' gonle par
ničh ca' šejəchle gonle can' cheyalə' gon chio'o
nombi'acho Xanchon' na' gonle doxen can' cha-
zlažə'enə', gonle yoguə' claste de'e güen, na' šejəch
gombia'achle Diozən'.

¹¹ Na' chnaba' gaquəlen Diozən' le'e len yelə' guac
xen che'enə' par ničh gaple yelə' chxenlažə' na'
sotezə sole gonlilažə'əlene' bitə'ətezə de'en chac na'
sole mbalaz. Chnaba' gaquəlene' le'e ca' chedə'
nape' le'ezelaogüe yelə' guac xen.

¹² Na' lecəzə güe'ele yelə' choxcwlen che Xacho
Diozən' chedə' le'enə' bene' par ničh txen len
yeziquə'achlə benə' ca' bagwleje' par zjənaque'
lažə' ne'enə' gaquə žjəyezochə len le' gan' chey
che'eni'ichgua.

¹³ Diozən' babebeje' chio'o xni'a gwxiye'enə'
de'en chnabia' benə' ca' chsa'aš lo'o de'e žcholən'
na' bene' par ničh chnabia' Xi'ine' Jesocristən'

chio'o ben' chaquene' chei.

¹⁴ Xi'ine' Jesocrist na'anə' gwdixjue' xtolə'əchon' par niç Diozən' chezi'ixene' checho.

Cristən' chozoe' chio'o binlo len Diozən'

¹⁵ Yichjla'aždao' Cristən' naquən cayaṇə'ən naquə yichjla'aždao' Xe' Diozən' ben' cui no chle'i, na' tozə can' chso'one'. Bazoczə Cristən' catə'ən cuiṇə' xe yežlyon', catə'ən cuiṇə' nitə' angl ca' na' beṇač ca', na' catə' cuiṇə' gatə' bitə'ətezə de'en zjəde.

¹⁶ Le'enə' bene' yoban' na' yežlyon' na' bene' beṇə' ža' yoban' na' beṇə' ža' yežlyon', na' bia yixə' ca', na' biquə'əchlə de'en zjəde yoban' na' yežlyon'. Bene' par niç zjəde de'e ca' chle'icho na' de'e ca' cui chle'icho. Bene' par niç nitə' angl əblao ca', nitə' spirit mal ca' chəsə'ənabia'an beṇə' ca' cui choso'ozenag che Diozən', nitə' de'e xio' na' nitə' biquə'əchlə de'e ca' zjənapə poder. Na' Crist nan' bene' par niç nitə' de'e ca', na' nitə' beṇə' ca', niç si'e yelə' bala'aṇ.

¹⁷ Cristən' bazoczə' catə'ən cuiṇə' nitə' beṇač, angl, bia yixə' na' biquə'əchlə de'en zjəde, na' noe' che to toe' zjənaque' can' zjənaque' na' to ton zjənaquən can' zjənaquən, chedə' Cristən' none' mendad par chac ca'.

¹⁸ Na' Crist na'anə' chnabi'e chio'o chdopə chžagcho cho'ela'ochone' na' len' beṇə' chio'o yelə' mban zejlicaṇen'. Len' naque' beṇə' nech bebane' ladjo beṇə' guat ca' par chnabi'e na' de'e na'anə' naque' le'ezelaogüe beṇə' blao na' chnabi'e yoguə'ələl beṇə' na' biquə'əchlə.

¹⁹ Diozən' chazlaže'e de que cayaṇə'ən naquə yichjla'aždaogüe'enə' ca'aczən' naquə yichjla'aždao'

Xi'ine' Cristən', cayanə'ən naquə yelə' guac che Diozən' ca'aczən' naquə yelə' guac che Cristən', na' tozəczə can' chso'one'.

²⁰ Na' leczə chazlažə' Diozən' de que yoguə' beṇə' ža' yoban' na' beṇə' ža' yežlyo nga guac yesə'anite'e binlo len le' laogüe de'en blalj xchen Cristən' le'e yag corozən'.

²¹⁻²² Goccho beṇə' contr che Diozən' antslə por ni che xbab malən' de'en gwyo'o lo'o yichjla'ažda'ochon' na' por ni che de'e malən' bencho. Pero na'a Cristən' babozoe' chio'o binlo len Diozən' ca de'en bnežjw cuine' por ni chečo catə'an gwso'ote'ene'enə'. Babozoe' chio'o binlo len Diozən' par nič ca' gaccho beṇə' la'aždao' xi'ilažə' na' bito bi dolə' gapcho catə'an yežincho gan' zo Diozən' na' catə'an əche'e chio'o laogüe'enə', na' notono soi əgwcuš chio'o lao Diozən'.

²³ Na' yežincho laogüe'enə' sin cui bi dolə' napcho šə zotezə zocho chonlilažə'əcho Cristən', šə zocho len tozə xbab, na' šə zocho lez žjəyecho len Diozən' laogüe de'en babzenagcho che dižə' güen dižə' cobə che Cristən'. Dižə' güen dižə' cobə che' na'anə' bagosə' gwlaljən gatə'atezə ža' beṇəčən' na' Dioz nan' gwleje' nada' Pab par nič əchyixjui'an.

Pabən' chaclene' beṇə' ca' chesə'ədopə chesə'əžag chso'elaogüe'e Cristən'

²⁴ Chebeida' la'anə'əczə chyi' chzaca'a laogüe de'en əchyixjui'a xtižə' Cristən' len le'e cui nacle beṇə' Izrael, na' che'enda' gaquə chia' bichlə de'en ne'e chac falť par yeyož gaquəlena' le'e. Cristən' gwdi' gwxaque'e par goclene' chio'o chdopə chžagcho cho'ela'ochone', chio'o

gwxaquə'əlebecho ca cuerp c̄he'enə', na' can' chac
 chia' par chaquələna' le'e.

²⁵ Diozən' gwleje' nada' par chona' xšine'enə' entr
 le'e cui nacle beṇə' Izrael par niç ca' gwzejni'ida'
 le'e doxen can' na xtiže'enə'.

²⁶ Dezd gwłalte de de'en bito no gwyejni'i can'
 na xtiže'enə' pero ṇa'a babzejni'i Diozən' chio'o len,
 chio'o bagwleje' par naccho lažə' ne'enə'.

²⁷ Diozən' chene'ene' əṇezecho de que
 lechgualē de'e güen juisy chone' len notə'ətezcho
 chonlilažə'əchone' la'anə'əczə cui naccho beṇə'
 Izrael. De'e na'anə' bachzejni'ine' chio'o de'en cui
 no gwṇeze antslə de que chio'o chonlilažə'əcho
 Cristən' ngodə'əcho txen len le' na' de'e na'anə'
 zocho lez žjəyezochō len Diozən' gan' chey
 che'eni'ichgua.

²⁸ Cho'elento' yoguə'əloḷ beṇə' dižə' c̄he Cristən'
 chatə'əyoiga'aqueto'one' par niç yoso'ozenague'
 c̄he' na' chzejni'iga'aqueto'one' naquən' ne'. Cho'eto'
 xtiže'en len yoguə' clas yelə' sin' par niç ca' catə'
 yežincho lao Diozən' yoguə' beṇə' ca' bosozenag
 c̄heto' əsa'aque' cayanə'an chene'e Diozən'
 əsa'aque' laogüe de'en zjəngode'e txen len Cristən'
 can' ngodə' chio'o.

²⁹ Na' de'e na'anə' chonchgua' xte ga zelao
 chzaquə'əda' əchyixjui'a xtiže'enə' len doxen fuers
 balor de'en choṇ Cristən' nada'.

2

¹⁻² Na' che'enda' əṇezele can' chona' xte ga ze-
 lao chzaquə'əda' par niç əchtipa' lažə'əle na'
 lažə' beṇə' ca' nitə' Laodisean' na' yeziquə'əchlə
 beṇə' ca' chso'onlilažə' Cristən' do na', beṇə' cuinə'

gombi'aga'aca'. Chona' xte ga zelao chzaquə'əda' par niç yoguə'əle gaque che ljuežjle tole yetole na' par niç nezele tcho'a tšao' can' cheyalə' gonle xbab yoguə' laste na' par niç šejni'ile che Cristən'. Cui no gwneze antslə de'en bachzejni'i Diozən' chio'o che Cristən'.

³ Na' šə bin' chene'echo nezecho, doxen yelə' sin' na' yelə' chejni'i che Diozən' napə Cristən' len par chzejni'ine'en chio'o.

⁴ Echnia' ca' par niç cui no yopei le'e len dižə' yoblə par xoayagle.

⁵ La'anə'əczə bito zoa' na' len le'e, syempr chona' xbab chele na' chebeida' de'en chonle can' cheyalə' gonle na' zotezə zole chonlilažə'əle Cristən'.

⁶ De'e na'anə' con can' babsedle che Jesocristən' na' can' bachonlilažə'əlene' ca Xanle, con ca'ašgacžən' sotezə sole len le'.

⁷ Na' le'e sotezə leso legonlilažə' Cristən' can' babzejni'i Epafrasən' le'e par niç gacle ca to yag de'e chaz loinə' zitjw na' chcha'ochguan. Na' le'e güe'echgua yelə' choxcwlen che Diozən' can' chac-lene' le'e.

Cristən' babocobe' yichjla'ažda'ochon'

⁸ Le'e gapə cuidad par niç notono yesə'əxoayag le'e len xbab chega'acze' par naole de'en choso'osed choso'olo'ine'. Lega'aque' choso'osed choso'olo'ine' de'en cui bi zaquə' che costombr gol ca' de'en zjəde, che de'en ye'ej gaocho, che ža ca' na' che cuerp chechon' lgua'a yoso'osed yoso'olo'ine' che Cristən'.

⁹ Cristən' lao goque' beņə' belə' chen goc yichjla'aždaogüe'enə' doxen can' naquə

yichjla'aždao' Diozən' na' ca'aczən' naque' na'a. Gwdape' yelə' guac cayaṇə'ən napə Diozən' na' ca'aczən' nape'en na'a. Bene' tozəczə can' chon Diozən' na' ca'aczən chone' na'a.

10 Na' Cristən' chnabi'ache' ca notə'ətezə angl əblao na' notə'ətezə de'e xio'. Na' chio'o laogüe de'en ngodə'əcho txen len Cristən' bitoch bi bi chyažjəchecho par so cuezcho binlo.

11 Na' leczə de'en ngodə'əcho txen len le' zocho to señy de'en zejen ca señy de'en ne' sirconsionnə'. Bito naquən señy de'en bzo beṇə' lao cuerp chechon', sino de'en bagwlejjyichjcho cuich chzenagcho che la'ažda'omalcho na'anə'. Cristən' babocobe' yichjla'ažda'ochon'.

12 Na' ca de'en bagwchoacho nisən' zejen ca gotcho na' bgašə'əcho txen len Cristən' na' leczə zejen ca bolis bosban Diozən' chio'o ladjo beṇə' guat ca'. Diozən' bolis bosbane' Cristən' ladjo beṇə' guat ca', na' catə'ən benlilažə'əchone' par bocobe' yichjla'ažda'ochon', canan' bene' par niç cuich naccho ca beṇə' guat.

13 Antslə gwxaquə'əlebecho ca beṇə' guat len yichjla'ažda'ochon' chedə' bito bzenagcho che Diozən', bzenagzechcho che la'ažda'omalchon'. Pero na' can' ben Diozən' par niç Cristən' bebane' ladjo beṇə' guat ca', leczə can' bocobe' yichjla'ažda'ochon' par niç cuich naccho ca beṇə' guat na' babezi'ixene' yoguə'əte xtolə'əchon'.

14 Diozən' bsele'e Cristən' gwdixjue' xtolə'əchon' le'e yag corozən' par niç cui si'icho castigw por ni che de'en cui bencho complir yoguə'əlo can' na lei che'enə' de'en nyojən'. De'e na'anə' lein' bitoch güe'en dižə' contr chio'o can' benən antslə.

15 Diozən' beque'e yelə' gwnabia' che angl bzelaoc
ca' na' de'e xio' ca' par nič cuich yesə'anabia'an
chio'o. Blo'ine' beṇachən' de que banitə'an xni'enə'
catə'an Cristən' gwdixjue' xtolə'əchon' le'e yag
corozən'.

*Cheyalə' cuec yichjcho de'e ca' zjəzaquə' len
Diozən'*

16 De'e na'anə' bito gwzenagle che beṇə' ca'
chəsə'əna chonle de'e mal ca de'en bito naole cos-
tombr ca' de'en na lei de'en bzoj de'e Moisezən' na'
bichlə costombr chega'aque'enə' de'en chəsə'əne'
cheyalə' ye'ej gaocho, o goncho lni, o can' gon-
cho catə' naquə bio' che'en, o de'en cheyalə'
gomba'ancho ža de'en chsa'aque'ne' naquən de'e
žialao.

17 Diozən' bene' par nič de'e Moisezən' bzoje'
che costombr ca' parzə nič bzejni'ine' chio'o latə'
dao' che Cristən' antslə ze'e yide'. Pero ṇa'a babidə
Cristən' na' costombr ca' bito zjəzaquə'an can'
zaquə' de'en nombi'acho Cristən'.

18 Nitə' beṇə' choso'osed choso'olo'ine' de que
cheyalə' gon cuincho ca to de'e cui bi zaquə'
na' cheyalə' güe'ela'ocho no angl na' goncho
bichlə de'en chəsə'əne' besə'əle'idaogüe'enə'. Bito
gwzenagle chega'aque' catə' əse'e le'e de que
cui chonle can' cheyalə' gonle. Con chso'on
cuinga'aque' xen chedə' choso'ozenague' che
la'ažda'omalga'aque'enə'.

19 Lega'aque' bito zjəngode'e txen len Cristən' ben'
chnabia' chio'o chdopə chžagcho cho'ela'ochone'.
Pero chio'o chdopə chžagcho cho'ela'ochone'
ngodə'əccho txen len le' na' len ljuežjcho ca' ca to to
part che cuerp chechon' ngodə'an txen len bechj

bnia' ca'. Na' de'en ngodə'əcho txen len Cristən' Diozən' chaclene' chio'o par niĉh chaquəchcho beṇə' šao' beṇə' güen.

²⁰ Ca naquən' ngodə'əcho txen len Cristən' catə'an gote', bito cheyalə' cue'ech yičjcho ĉhe costombr de'en zjəsə'ənao beṇə' ca' cui choso'ozenag ĉhe Diozən', costombr ĉhe de'en ye'ej gaocho, ĉhe ža ca' na' ĉhe cuerp ĉhechon'. La' chio'o bitoch naccho txen len beṇə' ca' cui choso'ozenag ĉhe Diozən' na' de'e na'anə' bito cheyalə' goncho can' chso'one'enə'.

²¹ De'e na'anə' bito gwzenagle ĉhe beṇə' ca' chəsə'əna: "Bito goxə'əle de'e nga, bito ye'ej gaole de'e na', na' bito canle de'en yeto."

²² Costombr ca' za'acquən ĉhe beṇəĉhən', la' yoguə' de'e ca' de'en chəsə'əne' cui goxə'əcho, cui ye'ej gaocho na' cui cancho, de'en ĉĉhinchon chəsə'əde ĉhei.

²³ Chsa'aque beṇə' de que costombr ca' zjənaquən de'e sin'. Len de'e chsa'aljlažə' beṇəĉh ca'azənə' par chse'ejni'alaže'e angl ca' na' par chso'on cuinga'aque' ca to de'e cui bi zaquə' na' par chəsə'əžaglaogüe' len cuerp ĉhega'aque'enə', pero bito sa'aclenən chio'o par niĉh cui əgwzenagcho ĉhe la'ažda'omalchon'.

3

¹ Can' bolis bosban Diozən' Cristən' ladjo beṇə' guat ca', leczə can' babocobe' yičjla'ažda'ochon'. De'e na'anə' cheyalə' cuec yičjcho ĉhe de'e ca' zjənaquə de'e zaque'e gan' zo Cristən' chnabi'e txen len Diozən'.

² Cheyalə' cue' yichjcho che de'e ca' zjəzaque'e len Diozən' caguə de'e ca' zjəzaque'e len beṇachən'.

³ Bagwlejyichjcho cuich chzenagcho che la'ažda'omalchon' na' mbancho par goncho can' chene'e Diozən'. Na' zocho txen len Diozən' laogüe de'en ngodə'əcho txen len Cristən' la'aṇə'əczə cui chsa'acbe'i beṇə'.

⁴ De yelə' mban checho zejlicane chedə' chonlilažə'əcho Cristən' na' Cristən' zotezə zoe' len chio'o. Na' catə' yide' de'e yoblə gone' par niçh yichjla'ažda'ochon' yeyož gaquən ca yichjla'aždaogüe'enə' na' gone' par niçh cuerp chechon' yeyaquən to cuerp cobə de'en gaquə lechgualē güen can' naquə cuerp che le'enə'.

Can' bencho antslə na' can' cheyalə' goncho na'a

⁵ Na' laogüe de'en babocobe' yichjla'ažda'ochon', cheyalə' cuejyichjcho de'e mal ca' de'en chene'e la'ažda'omalchon' goncho žlac zocho yežlyo nga. Bito co'o xtocho nic cuejyichjcho no'ol checho o be'en checho par solencho beṇə' yoblə. Bito goncho bichlə de'e yelə' zto'. Bito yebeicho bitə'ətezə de'en naquə de'e yelə' zto'. Bito selažə'əcho goncho bitə'ətezə de'e mal. Na' bito selažə'əcho de'e zan de'e gatə' checho, chedə' tozəczə ca mal naquən len de'en chso'on beṇə' chse'ejni'alaže'e lgua'a lsaquə'.

⁶ Gwžin ža catə' Diozən' gone' castigw zejlicane che beṇə' ca' chso'ela'ozeche' chso'one' de'e mal ca' zjanac ca'.

⁷ Antslə gwdacze benle de'e malən' ca de'e ca' bagwni'anə'.

⁸ Pero na'a cheyalə' cuejyichjle yoguə' de'e mal ca'. Bito əža'a ljuežjle na' bito locle. Bito gaquəxi'i

ljuežjle, bito gwžia əgwnitə' ljuežjle, na' bito güe'ele dižə' zban.

⁹ Bito güe'ele dižə' güenlažə' len ljuežjle. Bitoch gonle de'e ca' chedə' bagwzolao chbejyichjle cuich chzenagle che la'ažda'omallen' len de'e mal ca' de'en nan gonle.

¹⁰ Diozən' ben' ben yoguə'əcho babocobe' yichjla'ažda'ochon', na' chzejni'ine' chio'o par nič zda chaquəch yichjla'ažda'ochon' can' naquə yichjla'aždaogüe'enə'.

¹¹ Bitobi nonən par len Diozən' šə naccho beŋə' Izrael o šə cui naccho beŋə' Izrael. Bitobi nonən par le' šə zocho seňy de'en ne' sirconsision o šə cui zochon. Na' leczə bitobi nonən par le' šə naccho beŋə' zitə' la'anə'əczə šə za'acho yež de'e lechgualē ne'e naquə serrado. Na' le'egatezə ca' bitobi nonən par le' šə naccho esclabos o šə cui naccho esclabos. De'en naquə de'e žialao xen, gonlilažə'əcho Cristən'. Na' notə'tezə naccho šə bachonlilažə'əchone' ngodə'əcho txen len le'.

¹² Diozən' bagwleje' chio'o par naccho lažə' ne'enə' na' chaquene' checho. De'e na'anə' legon can' cheyalə' gon chio'o bagwlej Diozən' par naccho xi'inē'. Le'e yeyašə' leyeži'ilažə' ljuežjle na' legon güen len ljuežjle. Bito gon cuinle xen. Le'e gac beŋə' gaɣjwlažə', na' le'e gapə yelə' chxenlažə' len ljuežjle.

¹³ Na' le'e gwde ca'alə šə bi chac chele entr tole yetole, na' le'e yezi'ixen che ljuežjle šə chaquale bi babenene' le'e. Con can' babezi'ixen Cristən' checho ca'aczən' cheyalə' yezi'ixencho che ljuežjcho.

¹⁴ Na' de'en naquəch de'e žialao xench lao yoguə' de'e ca', cheyalə' gaque che ljuežjcho chedə' šə

chaquecho che l̥juežjcho nachən' l̥eczə goncho bitə'ətezəchlə de'en chene'e Diozən' goncho.

15 Diozən' gwleje' chio'o par so cuezcho binlo len xbab de'en yo'o lo'o yichjla'ažda'ochon' na' par socho binlo len l̥juežjchon'. De'e na'anə' legon ca gaqualen Diozən' le'e so cuezle ca', la' yoguə' chio'o chonlilažə'əcho Cristən' banaccho ca tozə family. Na' le'e güe' yelə' choxcwlen che Diozən' can' chaclene' le'e.

16 Lesotezə lesə legon xbab che de'e ca' babzejni'i Cristən' chio'o. Le'e gwzejni'i beṇə' l̥juežjle ca' na' le'e gatə'əyoiga'aquene' len yoguə' clas yelə' sin' par yoso'ozenague' che Cristən'. Legol̥ no salmos na' no imnos, na' bichlə de'en na Spirit che Diozən' golle, güe'ele yelə' choxcwlen che lo'o yichjla'ažda'olen' can' chaclen Xancho' le'e.

17 Na' bitə'ətezə de'e gonle na' bitə'ətezə dižə'an güe'ele, legonən na' le'e güe'en par nič Xancho Jeso'osən' si'e yelə' bala'an. Na' do tyempte güe'ele yelə' choxcwlen che Xacho Diozən' can' chaclen Xancho Jeso'osən' le'e.

Quingan' cheyalə' gon chio'o babocobə Diozən' yichjla'ažda'ochon'

18 Le'e no'olə le'e nšagna'ale, le'e gwzenag che be'en che to tole can' cheyalə' gon chio'o chonlilažə'əcho Xancho Cristən'.

19 Na' le'e beṇə' byo le'e nšagna'ale, legaque che no'ol che to tole na' bito gonle znia len lega'aque'.

20 Na' le'e bi'i xcuidə', le'e gwzenag che xaxna'ale yoguə'əloł bin' se'e le'e, chedə' can' chazlažə' Xancho' gonle.

21 Na' le'e nacle xaxna' bi'i xcuidə', bito con gonle ca yesə'əža'a yesə'əlocho', la' šə gonle ca' bitobi de gost nitə'əbo' na' bitoch yoso'ozenagbo' chele.

22 Na' le'e nacle mos, cheyalə' əgwzenagle yoguə'əlo| can' na xan žinnə'. Bito gonleile xan žinnə' gonlizle ca beṇə' chonchgua žinnə' catə'əzən' chgüie' le'e. Pero le'e do yichj do lažə'əle legon žinnə' laogüe de'e chaple Diozən' respet na' cui chene'ele əže'e le'e.

23 Na' bitə'ətezə de'en gonle, gonlen do yichj do lažə'əle par nič yebei Xancho Cristən' le'e, caguə par nič yebei xan žin na'azənə'.

24 Legon ca' chedə' nezczele de que Xancho Cristən' gone' par nič chio'o choncho can' chazlaže'enə' yežincho gan' zoe'enə'. Na' de'en gone' par nič yežincho gan' zoe'enə' zaquə'əchən ca laxjwchon'.

25 Na' notə'ətezə zjənaquə beṇə' ca' chso'on de'e malən', Xancho'n əgwnežjue' castigw che to toga'aque' segon naquən' gwso'one'.

4

1 Na' le'e xan žin, legon güen len beṇə' ca' chso'on xšinlen', chedə' nezele lezə zo Xanle ben' zo yoban'.

2 Legac beṇə' banlažə' par nič sotezə sole gonle orasyon, güe'ele yelə' choxcwlen che Diozən' can' chaclene' le'e.

3 Na' lenabe Diozən' gone' par nič gaquə latjə güe'elencha' beṇə' xtiže'enə' nič yesə'ənezene' de'en cui no gwneze antslə che Cristən'. La' por ni che de'en bi'a xtižə' Crist na'anə' dia' ližya nga.

4 Lenabe Diozən' əgwzejni'ine' nada' nič ənezda' naquən' yapəga'aca'ane' par nič se'ejni'ine'en.

⁵ Na' žlac n̄a'a n̄e'e de tyemp par gonlen, legon güen len beṇə' ca' cui zjənaquə txen len chio'o can' chejni'ile cheyalə' goncho.

⁶ Legüe' dižə' šao' dižə' güen na' dižə' de'en naquə de'e zaque'e yoguə' laste. Na' legon xbab par niḥ ənezele naclən' cheyalə' yoži'ile xtižə' to to beṇə'.

Chguape' beṇə' migw che' ca' diox

⁷ Tiquicon' əne' le'e yoguə'əlol can' chac chia'. Le' naque' beṇə' bišə'əcho na' chacda' che'. Zotezə zoe' chone' complir can' cheyalə' gone' par chaclene' nada' chona' xšin Xancho Cristən'.

⁸ Echselə'ane' par niḥ ənezele can' chac chia' na' par niḥ əgwtepe' lažə'əle.

⁹ Na' txen len le' choselə'a beṇə' bišə'əcho Onesimon' ben' naquə beṇə' gwlaž chele na' ben' chaquecho chei. Lenczə le' zotezə zoe' chone' complir can' cheyalə' gone'. Echselə'əga'aca'ane' par niḥ yesə'əne' le'e yoguə' de'en chonto' nga.

¹⁰ Aristarcon' ben' de ližya nga len nada' chguape' le'e diox. Na' Marcos beṇə' sobrin che Bernaben' leczə chguape' le'e diox. Bagwnia' can' cheyalə' gonle güen len Marcosən' catə' le'e gan' zolen'.

¹¹ Na' Jeso'os ben' zjənsi'e Josto leczə chguape' le'e diox. Caguə nochlə beṇə' Izrael chsa'aclene' nada' len de'en chona' par niḥ nabia' Diozən' beṇə' zanch sino beṇə' ca' šonzə. Na' zocha' mbalaz laogüe de'e chsa'aclene' nada'.

¹² Nach leczə beṇə' gwlaž chele Epafrasən' ben' chon xšin Cristən' chguape' le'e diox. Yoguə' laste catə' chone' orasyonṇə' chṇabchgüe' əgwzejni'i Diozən' le'e yoguə'əlol de'en chene'ene' gonle na'

par ničh yeyož gonlen na' gacle cayanə'an chene'e Diozən' gacle.

¹³ Che'enda' ənezele can' chonchgüe' orasyon par le'e chonlilažə'əle Cristən' Colosas, Laodisea na' Ierapolis.

¹⁴ Na' lenczə Locas ben' naquə beṇə' güen rmech ben' chacda' čhei chguape' le'e diox na' leczə' ca' Demasən' chguape' le'e diox.

¹⁵ Le'e gguapšga diox beṇə' bišə'əcho ca' ža' Laodisean', len Ninfas na' beṇə' ca' chesə'ədopə chesə'əžag chso'elaogüe'e Diozən' liže'enə'.

¹⁶ Na' catə' yeyož gwlabl cart nga, əgwnežjwlen beṇə' ca' chesə'ədopə chesə'əžag chso'elaogüe'e Diozən' Laodisean' par ničh yoso'olabe'en. Na' leczə le'e gwlab cartən' de'en bselə'a par beṇə' Laodisea ca'.

¹⁷ Na' le'e ye' Arquipon' de que chneyoida'ane' gone' seguir len xšin Diozən' de'en chone'enə' par ničh yeyož gone' yoguə'əlol de'en gwlej Xancho Cristən' le' gone'.

¹⁸ Part dao' čhe cart nga nada' Pab chzoja'an cuincza'. Bito ganlazažə'əle can' dia' ližya nga. Diozən' sošgue' gaquəlenšgacze' le'e. De'e na'azə chzoja' na'a. *Pab*

**Testament Cobə de'en choe' dižə' che ancho
Jesocristən'
New Testament in Zapotec, Yatzachi (MX:zav:Zapotec,
Yatzachi)**

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
d439ce34-67af-5db7-b82c-f44ad9932db2